

<County: Yorkshire East Riding>

<Code: L1134>

<MS reference: Kingston-upon-Hall, Corporation Archives, Bench Book 2>

<Text: Award>

This is the acord & awarde made be-for Symond of Dedale Maire of kyngeston~ opon~ Hull the Friday next eftre
 the fest of seint Gregorie yn the 3ere of oure lorde the kyng henry fift yat nowe is the second be vs John
 waleys Robert Shakels John Greg & John Saunderson Arbitrouers chosen be the Maire forsaide and be the assent of
 parties efter-written be-twen william hedon of y^t one partie & Thomas Swan & Alison~ of Beuerley of y^t other partie of
 title & debate of a tenement with the appurtenant³ in kyngeston~ opon~ Hull & other debates & quereles be-twen
 yame yn any tyme be-for yis day hade In y^e firste we awarde y^t ather partie forsaide forgif & releys till other
 all manere accions & debates moued be-twen~ yame whethir y^t it be in spirituell Court or temporell Also we award
 y^t the entre made be william hedon forsaied in y^e same tenement opon~ Thomas Swan & Alison forsaied & the
 seisyne & feoffament deliuered be y^e same william vnto vicar of kayngham & other sal+be anulled voide & halden
 as noght And y^t y^e forsaied Thomas swan & Alson~ stand in thar first estate y^t yai warem<?> In y^e tenement forsaied
 be-for entre made be y^e forsaied william And then y^e forsaied Thomas swan & Alson~ sal deliuer to y^e forsaied
 william half y^e tenement forsaied w^t y^e appurtenant³ And also we award y^t y^e forsaied Thomas swan~ & Alson~
 sal gif to the same william C s~ for withholdyng of y^t half tenement fro y^e same william Also we award
 y^t y^e forsaied Thomas swan & Alson~ sal deliuer all y^e dedes of y^e forsaied tenement y^t yai haue in kepyng in-to
 y^e handes of Symond of Dedale then Maire to kepe in meen~ hand to y^e vse of bothe y^e parties forsaied to haue



retours vn-to in tyme of nede the whilk awarde the forsaied Thomas & Alson~ hase *perfourmed* of
thare *partie*
And y^e forsaied william hase noght *perfourmed* oure awarde be-cause y^t he occupies & has occupied
all y^e hole
tenement forsaied to this day ¶ <lat></lat>